

Служба обща
новомученику Российскому 20-го века единому
Вечер

На Господи, возвах: стихиры, глас 2.

Подобен: Киими похвальными венцы:

Киими похвальными венцы/ увязем страдальца Христова (имярек),/ Церкви Российския вернаго сына?/ Иже устрашений безбожных не убоюся,/ на беззаконное судище възиде/ и, яко древний мученик, о убийцах моляшеся, вопия:/ Господи, прости им, не ведят бо, что творят.

Киими достойными песньми/ воспоем новомученика Христова (имярек)?/ Иже, заповеди Господни исполнив,/ узы темничныя, труды горькия и изгнания претерпе/ и даже до смерти Христу верным пребысть./ Ныне же молится даровати нам/ мир и велию милость.

Киими песненными добротами/ прославим новаго мученика Российскаго (имярек)?/ Иже, во страдании крепость явив,/ силою Христовою безбожныя одоле/ и смертью своею воскресение Христово проповеда./ Ныне же у престола Божия с лики новомученик предстоит/ и молится спастися душам нашим.

Слава, глас 8:

Аще и убиша тело твое многострадальное, мучениче (имярек),/ и кровь твою неповинную пролияша нечестивии,/ обаче душа твоя, яко птица, избавися от сети ловящих./ Сего ради, святе, обрел еси покой в чертозех Небесных,/ идеже прославляеши Отца и Сына и Святаго Духа/ Троицу Единосущную и Нераздельную.

И ныне, Богородичен, глас тойже: Царь Небесный:

Вход. Прокимен дне. И чтения.

Пророчества Исаиина чтение (глава 43):

Тако глаголет Господь:/ вси языцы собращася вкупе, и соберутся князи от них./ Кто возвестит сия в них?/ Или, яже от начала, кто слышана сотворит вам?/ Да приведут свидетели своя, и оправдятся,/ и да услышат, и да рекут истину./ Будите Ми свидетели,/ и Аз Свидетель, глаголет Господь Бог,/ и отрок, егоже избрах./ Да познаете и веруете Ми/ и разумеете, яко Аз есмь,/ прежде Мене не бысть ин Бог, и по Мне не будет./ Аз есмь Бог,/ и несть, разве Мене, спасаяй./ Аз возвестих и спасох,/ уничижих и не бе в вас чуждый./ Вы Мне свидетели, и Аз Господь Бог,/ и ещѣ от начала Аз есмь,/ и несть от рук Моих избавляяй./ Сотворю, и кто отвратит то?/ Сице глаголет Господь Бог,/ избавляяй вас Святыи Израилев.

Премудрости Соломоновы чтение (глава 3):

Праведных души в руце Божией, и не прикоснется их мука./ Непщевани быша во очесех безумных умрети,/ и вменися озлобление исход их./ И еже от нас шествие — сокрушение,/ они же суть в мире. / Ибо пред лицом человеческим, аще и муку примут,/ упование их безсмертия исполнено./ И вмале наказани бывше, великими благодетельствовани будут,/ яко Бог искуси я и

обрете их достойны Себе./ Яко злато в горниле, искуси их/ и, яко всеплодие жертвенное, прият я. / И во время посещения их возсияют/ и, яко искры по стеблию, потекут./ Судят языком и обладают людьми,/ и воцарится Господь в них во веки. / Надеющиеся Нань разумеют истину/ и вернии в любви пребудут Ему,/ яко благодать и милость в преподобных Его/ и посещение во избранных Его.

Премудрости Соломоновы чтение (глава 4):

Праведник, аще постигнет скончатися, в покои будет./ Старость бо честна не многолетна,/ ниже в числе лет исчисляется./ Седина же есть мудрость человеком,/ и возраст старости житие нескверное./ Благоугоден Богови быв, возлюблен бысть/ и живой посреде грешник преставлен бысть./ Восхищен бысть, да не злоба изменит разума его / или лесь прельстит душу его./ Рачение бо злобы помрачает добрая/ и парение похоти пременяет ум незлобив./ Скончався в мале, исполни лета долга,/ угодна бо бе Господеву душа его,/ сего ради потщася от среды лукавствия./ Людие же видевше и не разумеюще,/ ниже положше в помышлении таковое,/ яко благодать и милость в преподобных Его / и посещение во избранных Его.

На стиховне стихиры, глас 4.

Подобен: Яко добля:

Яко благий раб и верный,/ собирая сокровище не гиблющее,/ но в живот вечный пребывающее,/ талант, врученный ти Господем,/ мучением преумножил еси,/ страдальче славный (имярек),/ и в радость Господа твоего вшел еси./ Темже моли усердно/ спастися душам нашим.

Стих: Праведник, яко финикс, процветет,/ яко кедр, иже в Ливане, умножится.

В нощи безбожных гонений/ на Церковь Русскую/ прииде испытати душу твою Господь/ и блаженнаго тя раба,/ бдяща воистинну обрете,/ всечестне мучениче (имярек)./ И ктому нарече тя друга искреняго/ и сонаследника Царствия Небеснаго/ и молитвенника тепла о душах наших.

Стих: Насаждени в дому Господни,/ во дворех Бога нашего процветут.

Исполняются на мученицех словеса Христова:/ несть раб болий Господа своего,/ Мене изгнаша и вас ижденут./ Ты убо, мучениче доблий (имярек),/ любовь совершenu стяжав,/ душу твою за Христа положил еси/ и блаженство изгнанных правды ради достигл еси./ Темже, ныне Престолу Божию предстоя,/ моли спастися душам нашим.

Слава, глас 5:

Приидите, мучениколюбцы вси,/ благочестно воспоим Христова стратотерпца славнаго (имярек),/ течение добре совершивша / и веру православную сохраняша./ Сей бо, безбожных козни сокрушив / и кровию своею Землю Русскую освятив,/ от мира сего временнаго преставися к вечному/ и от Вседержительных

десницы прият венец правды./ Темже сладости райсаго
блаженства наслаждается/ и Престолу Божию предстоит./
прославляя Троицу Единосущную и Нераздельную.

И ныне, Богородичен: Храм и Дверь еси:

Тропарь, глас 4:

Мученик Твой, Господи, (имярек),/ во страдании своем венец
прият нетленный от Тебе, Бога нашего,/ имеяй бо крепость Твою,/
мучителей низложи,/ сокруши и демонов немощныя дерзости./
Того молитвами/ спаси души наша.

На утрени

По 1-м стихословии седален, глас 4:

Непоколебимъ во исповедании веры пребыл еси, страдальче
(имярек),/ егда мучителие понуждаху тя отрещися Христа./
Темже смерть Того ради мужественне претерпел еси/ и
молитвенник теплый о душах наших явился еси.

Слава, и ныне, Богородичен:

О Всепетая Богородице Владычице,/ мучеников исповедание и
венце,/ Ангелы славимая и человеки воспеваемая,/ и всего мира
возжеленная Помощнице,/ избави Церковь Русскую всякаго
обстояния, Едина Благословенная.

По 2-м стихословии седален, глас 4:

Страдания лютая доблественне претерпевая, мучениче (имярек),/
евангельския заповеди соблюл еси/ и, яко добрый и верный раб, в
радость Господа твоего вшел еси,/ Иже воздаде ти по правде
твоей/ и яви людем Российским споборника необорима.

Слава, и ныне, Богородичен:

Стена необоримая верным и мучеником похвала Ты еси,
Богородице Дево,/ к Тебе бо прибегающе, невредими пребываем и
Усердную Молитвенницу имамамы./ Тем, благодаряще, вопием Ти:/
радуйся, Благодатная, Господь с Тобою.

Величание:

Величаем тя,/ страсотерпче святыи (имярек),/ и чтим честная
страдания твоя,/ яже за Христа/ претерпел еси.

Псалом избранный:

Бог нам Прибежище и Сила, Помощник в скорбех, обретших ны
зело.

Мене ждаша грешницы погубити мя, свидения Твоя разумех.

Глаголах о свидениях Твоих пред цари и не стыдяхся.

Вси языцы обыдоша мя и именем Господним противляхся им.

Аз на раны готов/ и бых язвен весь день.

Тебе ради умерщвляемся, вменихомся, яко овцы заколения.

Господь Утверждение мое и Избавитель мой, и уповаю на Него.

Крепость моя и пение мое Господь, и бысть мне во спасение.

Ты, Господи, сохраниши ны и соблюдеши ны от рода сего и во век.

Искусил ны еси, Боже, разжегл ны еси, якоже разжизается сребро.

По полиелеи седален, глас 4:

Скорби, слезы и страдания за Христа от безбожных братий
претерпев на земли, мучениче (имярек),/ ныне жизни вечныя

радостне у Престола Божия наслаждаешься/ и молишися
непрестанно о душах наших.

Слава, и ныне, Богородичен:

Непоколебимое Утверждение веры/ и присное Прибежище душ
наших,/ Богородицу песньми величаем, вернии:/ радуйся,
Православия Ограждение,/ радуйся, Земли Русския Покрове,/ радуйся, Невесто Невестная.

Степенна, 1-й антифон 4-го гласа.

Прокимен, глас 4: Господи, Тебе ради умерщвляеми есмы весь
день. Стих: Вменихомся, яко овцы заколения.

Всякое дыхание: Евангелие от Луки, зачало 63.

По 50-м псалме стихира, глас 6:

К Богу Вышнему Живому/ воззвал еси, мучениче добропобедне
(имярек):/ помилуй мя, Господи,/ яко врази нечестивии
попирают мя./ Той же избави душу твою от смерти,/ очи от слез и
нозе от поползновения,/ и со святыми Земли Русския/ во свете
живых прослави тя.

Канон, глас 5:

Песнь 1

Ирмос: Коня и всадника в море Чермное,/ сокрушай брани
мышцею высокою,/ Христос истрясе,/ Израиля же спасе,/ победную
песнь поюща.

Кровными мучений вшел еси в Небесная селения, (имярек)
славне,/ якоже древле Израиль в землю обетованную, фараоном
гонимь./ Ныне же, Престолу Святыя Троицы предстоя,/ моли о
чтущих святую память твою.

Русския Церкви сыне верный, (имярек) и страдальче изрядный,/ ты
сквозе огонь и воду мучений победно прошел еси./ Темже и
Господь Мучениколюбец уготова ти покой вечный.

Егда прииде на Землю Русскую година безбожия,/ крепость во
исповедании веры и кротость во страдании явил еси, доблий
мучениче,/ моляся о убивающих тя.

Богородичен: Разрешися клятва, печаль преста,/ Благословенная
бо и Благодатная Богородица верным Радость пороуди,/ — Христа,
Спасение мира.

Песнь 3

Ирмос: Водрузивый на ничесомже землю повелением Твоим,/ и
повесивый неодолимо тяготеющую,/ на недвижимем, Христе,
камни заповедей Твоих,/ Церковь Твою утверди, / едине, Блаже
и Человеколюбче.

Праведных души в руце Божией и не прикоснется их мука,/ — сею
надеждою укрепляемь, (имярек) крепкодушне,/ телесная
страдания мужественно терпел еси.

Одеявся силою крестною,/ противостал еси, (имярек)
проливающим кровь неповинную/ и не убоялся еси истину
возвещати врагом Церкви Христовы.

Смятесе Земля Русская, понеже беззаконию предадеса,/ ты же,
мучениче (имярек) преславне,/ закон Божий небоязненно

исполняя,/ непоколебимь Царствия ради Божия явился еси.
Богородичен: Ты, Мати Божия, неизреченно родила еси Сына,/ от
Отца прежде век рожденна./ Темже Тя, Богородицу, православно
величаем.

Седален, глас 3:

Глад, гонения веляя, лишения различная,/ скорби многия,
тесноту и во узах горькия работы/ мужественне претерпел еси от
ненавидящих Господа, страдальче (имярек),/ и ничтоже возможе
разлучити тя от любве Христовы,/ Егоже ради и смерть
мученическую приял еси./ Мы же тя, яко теплаго предстателя к
Нему стяжавше,/ достодолжно прославляем.

Слава, и ныне, Богородичен:

Кийждо, идеже спасается, тамо праведно и притекает,/ и кое иное
прибежище, яко Ты, Богородице,/ отечества нашего Усердная
Заступница.

Песнь 4

Ирмос: Божественное Твое разумею истощание/ прозорливо
Аввакум, Христе, со трепетом вопияше Тебе:/ во спасение людей
Твоих/ спасти помазанныя Твоя пришел еси.

Егда смятеся Земля Русская,/ ты, страдальче (имярек), яко добр
воин Христов,/ терпением потекл еси на предлагающий подвиг/ и,
багряницею кровей одеявся,/ мученически пострадал еси.

Понеже в малом верен раб явился еси, славне,/ Господь вящший
дар ти вручи,/ еже исповедати пред мучители Бога истиннаго,/
Егоже ради и пострадал еси.

Попущением Божиим бысть гонение на Церковь Божию в стране
Российстей,/ ты же, мучениче, яко доблий воин Христов,/
непоколебимь в заповедех Господних пребыл еси.

Богородичен: Зачала еси, нетленно во чреве, Пречистая,/ и без
болезни Бога плотию родила еси,/ и по рождестве Дева пребыла
еси.

Песнь 5

Ирмос: Одейся светом, яко ризою,/ к Тебе утреннюю,/ и Тебе
зову:/ душу мою просвети, омраченную, Христе,/ яко един
Благоутробен.

Яко сын дне, на Небо душею твоею возшел еси, страдальче
(имярек),/ и Землю Русскую кровию твоею оросил еси./ Сего ради
Небо и земля ныне тя совокупно величают.

Ни гонение лютое, ни узы темничныя,/ ни работы горькия, ни
скорбь, ни теснота/ возмогша тя отлучити от любве Божия,
мучениче,/ обаче, Христом укрепляемь, вся препобедил еси.
Верен быв Церкви Божией,/ и в чистоте соблюдая единство ея,/
чуждался еси разделений, блаженне,/ и присно молился еси о
первоиерарсе Российстем.

Богородичен: Покров, Заступление и Утешение в напастех и злых
обстояниих Ты еси, Богородице./ Сего ради благодарственно Тя
величаем.

Песнь 6

Ирмос: Неистовствующееся бурею душетленною, Владыко Христе,/ страстей море укроти,/ и от тли возведи мя,/ яко Благоутробен.

Егда буря гонений одержаше корабль Церкви Русския,/ ты, мучениче, небоязненне и неисходне в нем пребыл еси,/ имея Кормчаго Самого Христа.

Егда людие безбожнии восташа на Церковь Русскую,/ ты, терпеливодушне, не убоявся лишений,/ верен даже до смерти Христу пребыл еси.

Егда оклеветан бысть ближними твоими, святе,/ в сердце зла никакоже на оныя имея, молился еси:/ Господи, не вмени им греха сего.

Богородичен: Дева Пречистая, Христа, Младенца рождши,/ во Египте изгнание Иродово претерпе,/ темже, страдания испытавши,/ может и нам, бедствующим, помощи.

Кондак, глас 5:

Верный сын Земли Русския явился еси,/ новомучениче (имярек),/ Христа, Солнце Правды, возвещая/ и безбожия тьму отгоняя./ Ныне же, сродники твоя в Православней вере утверждая,/ молися о душах наших.

Икос:

Что ты наречем, доблий мучениче (имярек):/ изгнанника, яко дома и сродников лишился еси?/ Узника, яко темничныя узы претерпел еси?/ Друга Божия, яко ближним во страданиях помогал еси?/ Исповедника, яко веру твердую явил еси?/ Страдальца, яко муки испытал еси?/ Ныне же, престолу Божию предстоя,/ сродники твоя в Православней вере утверждай/ и молися о душах наших.

Песнь 7

Ирмос: Превозносимый отцев Господь,/ пламень угаси,/ отроки ороси,/ согласно поющыя:/ Боже, благословен еси.

Егда земля Русская поколебася грех ради наших,/ явил еси твердое исповедание веры, (имярек) премудре,/ безбожия пламень угашая.

Общаго безумия и умов шатания чужд явился еси, мучениче (имярек),/ обаче любовию ко Христу распалаемь,/ твоим страданием обличил еси безбожие.

Злобу и ругательства мучителей претерпевая, (имярек),/ утвердил еси стопы твоя, яко на камени,/ имея в сердце глагол Христов:/ буди верен до смерти и дам ти венец живота.

Богородичен: Едину убо Ипостась во двою естеству, Богомати, родила еси, Бога и Человека./ Темже, вернии, с любовию возопиим:/ благословенна Ты в женах еси, Всенепорочная Владычице.

Песнь 8

Ирмос: Тебе Вседетелю,/ в печи отроцы всемирный лик сплетше, пояху:/ дела всякая, Господа пойте,/ и превозносите во вся веки.

Егоже отроцы в печи воспеша,/ Той и ты, страдальче, в пламени

гонений сохрани, взывающа:/ благословен еси, Боже, отец наших.
Слагая в сердце твоём глагол Христов,/ еже не бояться
убивающих тело, души же не могущих убить,/ мужественно на
подвиг страдания потекл еси, святе, взывая:/ благословен еси,
Боже, отец наших.

Аще и предашася поруганию и осквернению святыни земли
Русския,/ обаче не изнемогл еси душею/ и тверд в вере пребыл
еси, (имярек), взывая:/ благословен еси, Боже, отец наших.
Богородичен: Зрящи Сына Твоего, Пречистая, в земли нашей
поругаема безбожники,/ Церковь Русскую не оставила еси
ходатайством Твоим, достойно взывающу:/ радуйся, Благодатная,
Господь с Тобою.

Песнь 9

Ирмос: Исаие, ликуй,/ Дева име во чреве,/ и роди Сына
Еммануила,/ Бога же и Человека,/ Восток Имя Ему:/ Егоже,
величающе, Деву ублажаем.

Славу единому Богу воздал еси,/ Иже славящия Его прославляет,/
темже роди русстии тя ублажают,/ мучениче (имярек)
приснопамятне.

Страдания твоя и смерть мученическая, блаженне,/
свидетельствоваху любовь твою ко Христу, Сыну Божию./ Темже,
ныне жизни вечны наслаждаяся,/ молися о нас, любовьию тя
прославляющих.

Победным венцем увенча тя Христос Бог,/ Егоже возлюбил еси и
Егоже ради кровь твою пролиал еси./ Емуже ныне прилежно
молися,/ Православию в земли нашей утвердиться/ и душам
нашим спасение улучити.

Оружием благоволения венча тя Господь, мучениче всечестне
(имярек),/ и даде тебе силу на безбожных гонители./ Темже и
ныне, яко добр воин,/ споборствуй Церкви Русстей на враги
многия.

Богородичен: О, Царице Многопетая!/ О, Владычице Державная!/
Не остави нас милостию Твоею,/ с новомученики Российскими Тя
величающих.

Светилен:

Тьмы безбожия отворотився,/ страдания за Христа претерпел еси,
достохвальне (имярек),/ ныне же во светлостех святых с
новомученики ликовствуя,/ моли спасти и просветити чада
Церкве Русския.

Слава, и ныне, Богородичен:

Отжени тьму греховную душ наших/ и к свету заповедей
Христовых направи, Путеводительнице истинная,/ да, покаянием
очистившеся, гласы благодарственными Тя величаем.

На хвалитех стихиры, глас 5.

Подобен: Радуйся:

Радуйся, новомучениче прехвальне, (имярек),/ истинный сыне
Святыи Церкви,/ во всеоружие Христова облеченный/ и веры ради
до крове подвизавыйся./ Ты, гонители благословляя, глаголали

еси:/ аще и тело мое убиеете,/ душу же не возможете разлучити от любви Божия,/ яже о Христе Иисусе./ Егоже моли спасти и просветити души наша.

Радуйся, страдальче изрядный, (имярек),/ истинный Христов подобниче,/ Крест Господень на рамо приемый,/ и в годину гонений лютых на Церковь Русскую пострадавый./ Ты бо, поношений не убоаяся,/ лишения, узы и работы горькия ничтоже вменил еси/ и смерть яко приобретение жизни вечныя со Христом/ достойно и радостно сретил еси./ Егоже моли спасти и просветити души наша.

Радуйся, мучениче достохвальне, (имярек),/ кровьюи страдальческими обгащенный,/ присный о нас предстателю/ и теплый к Богу молитвенниче./ Ты, ныне престолу Божию предстоя,/ с лики новомученик и исповедник Российских/ о земнем Отечестве твоём ходатайствуеши/ и Христу песнь благодарственную приносиши./ Егоже моли спасти и просветити души наша.

Слава, глас 8:

Славою и честию нетленною/ венча Господь многострадальную твою главу,/ яко посреде безбожных гонений лютых,/ дал еси славу хвале Его,/ мучениче добропобедне (имярек),/ Церкви Русския удобрение.

И ныне, Богородичен, глас тойже.

Подобен: О, преславнаго чудесе:

Срадуются с нами умная вся Чинопочаляя,/ лик духовный совокупльше,/ видяще Царицу и Владычицу всех,/ многоименне верными славиму,/ радуются же и души праведных,/ сущии зрителие видения,/ на воздухе Свои руце молебнo простирающу,/ просящу умирения миру/ и спасения душам нашим.

Славословие великое и отпуст.

На Литургии

Блаженна от канона, песни 3-я и 6-я. Прокимен, глас 4: Аще пойду посреде сени смертныя, не убоюся зла, яко Ты со мною еси. Стих:

Господь пасет мя и ничтоже мя лишит. Апостол к Тимофею, зачало 292 (2 Тим. 2, 1-10). Аллилуиа, глас 6: Живый в помощи Вышняго, в крове Бога Небеснаго водворится. Стих: Речет Господеву: Заступник мой еси и Прибежище мое, Бог мой и уповаю на Него. Евангелие от Иоанна, зачало 52 (Ин. 15, 17-27).

Причастен: В память вечную будет праведник:

Молитва

О преславный и добропобедный мучениче Христов (имярек), истинный воине святых Церкви, сродником твоим земным похвало и украшение. Ты, не убоаяся безбожнаго гонения, веру Православную даже до крове исповедал еси, страдания же твоими образ верным подая, вратами правды в Царство Небесное вшел еси. Темже молим тя, якоже некогда молитвою твоею ко Господу силу претерпети страдания стяжал еси, тако и ныне молися, да подаст нам Господь силу заповеди Его животворныя соблюдатьи, и

да избавит нас от уз греха и безбожия, Отечество же наше да
сохранит в Православии до скончания века. Аминь.